



МОНГОЛ УЛС ШАДАР САЙДЫН ТУШААЛ

20 18 оны 10 дугаар
сарын 31 -ны өдөр

Дугаар 108

Улаанбаатар
хот

Журам батлах тухай


Засгийн газрын тухай хуулийн 24 дүгээр зүйлийн 2 дахь хэсэг, Стандартчилал, техникийн зохицуулалт, тохирлын үнэлгээний итгэмжлэлийн тухай хуулийн 25.4 дэх заалтыг тус тус үндэслэн ТУШААХ нь:

1. Монгол Улсын Засгийн газрын 2016 оны 344 дүгээр тогтоолоор баталсан “Үндэсний чанарын хөтөлбөр”, түүнийг хэрэгжүүлэхээр батлагдсан үйл ажиллагааны төлөвлөгөөний 106 дахь заалтын хэрэгжилтийг хангуулах зорилгоор “Үндэсний чанарын шагнал олгох журам”-ыг хавсралт ёсоор баталсугай.


2. Үндэсний чанарын шагналыг олгох үйл ажиллагааг жил бүр зохион байгуулж, энэхүү тушаалын хэрэгжилтийг хангаж ажиллахыг Стандарт, хэмжил зүйн газар /Г.Гантөмөр/-т даалгасугай.

Монгол Улсын Шадар сайд




Ө.ЭНХТҮВШИН

Ганзориг

 01/7



ҮНДЭСНИЙ ЧАНАРЫН ШАГНАЛ ОЛГОХ ЖУРАМ

Нэг. Нийтлэг үндэслэл

Хэрэглэгчдийг чанартай, аюулгүй, баталгаатай бүтээгдэхүүн, үйлчилгээгээр хангаж, үндэсний үйлдвэрийн өрсөлдөх чадварыг дээшлүүлэх талаар санаачилга гаргаж, тодорхой үр дүнд хүрсэн аж ахуйн нэгж, байгууллагыг “Үндэсний чанарын шагнал”-аар шагнаж урамшуулахад энэхүү журмыг мөрдөнө.

Хоёр. Зорилго

Монгол Улсад хөдөлмөр эрхлэлтийг дэмжих, ажлын байр нэмэгдүүлэх чиглэлээр үйлдвэрлэлийг хөгжүүлж, хэрэглэгчдийг чанартай, аюулгүй, баталгаатай бүтээгдэхүүн, үйлчилгээгээр хангах, үндэсний үйлдвэрийн бүтээгдэхүүний өрсөлдөх чадварыг дээшлүүлэх, экспортыг нэмэгдүүлэх, импортыг орлох бүтээгдэхүүн үйлдвэрлэх, чанар, байгаль орчин, хүнсний аюулгүй байдлын болон бусад менежментийн тогтолцоог хэрэгжүүлж, хөгжүүлэх чиглэлээр манлайлж байгаа аж ахуйн нэгж, байгууллагыг олон нийтэд сурталчлан таниулахад “Үндэсний чанарын шагнал”-ын зорилго оршино.

Гурав. Үндэсний чанарын шагнал олгох

3.1. Үндэсний чанарын шагнал нь цом, батламжаас бүрдэнэ. Үндэсний чанарын шагналын цом нь энэхүү журмын хавсралтад заасан хэлбэр, хэмжээтэй байна.

3.2. Үндэсний чанарын шагналыг дараах чиглэлээр нэг жилд:

- Байгууллагад;
- Бүтээгдэхүүнд;
- Үйлчилгээнд гэсэн төрлөөр шалгаруулж тус бүр нэг байгууллагад “Үндэсний чанарын шагнал”-ын цом, батламж олгоно.

3.3. Энэхүү журмын 3.2-т заасан “Үндэсний чанарын шагнал”-ын цом, батламжийн зардлыг Стандартчилал, техникийн зохицуулалтын асуудал хариуцсан төрийн захиргааны байгууллагын төсөвт тусган хэрэгжүүлнэ.

3.4. Үндэсний чанарын шагнал олгох үйл ажиллагааг Стандартчилал, техникийн зохицуулалтын асуудал хариуцсан төрийн захиргааны байгууллага нь Монголын Үндэсний Худалдаа аж үйлдвэрийн танхимтай хамтран жил бүрийн Дэлхийн чанарын өдөр, үндэсний чанарын долоо хоногийг тэмдэглэх арга хэмжээний үеэр зохион байгуулна.

3.5. Дэлхийн чанарын өдөр, үндэсний чанарын долоо хоногийг тэмдэглэхээс хуанлийн 30-аас доошгүй хоногийн өмнө үндэсний чанарын шагналын шалгаруулалтыг зохион байгуулах тухай зарыг Стандартчилал, техникийн зохицуулалтын асуудал хариуцсан төрийн захиргааны байгууллагын албан ёсны цахим хуудас болон бусад мэдээллийн хэрэгслээр олон нийтэд мэдээлнэ.

Дөрөв. “Үндэсний чанарын шагнал”-ыг олгох
шалгаруулалтын үйл ажиллагаа

4.1 Үндэсний чанарын шагналыг олгох шалгаруулалтыг зохион байгуулах ажлын хэсгийг Стандартчилал, техникийн зохицуулалтын асуудал хариуцсан төрийн захиргааны байгууллагын даргын тушаалаар байгуулна.

4.2 Чанарын үндэсний зөвлөл нь энэ журмын 4.1-д заасан ажлын хэсгийн саналыг үндэслэн “Үндэсний чанарын шагнал”-ыг дэлхийн чанарын өдрийг тэмдэглэх арга хэмжээний үеэр олгоно.

4.3. Ажлын хэсгийн бүрэлдэхүүнд төрийн болон төрийн бус байгууллагын төлөөллийг оролцуулна.

4.4. Энэхүү журмын 5 дугаар зүйлд заасан нэр дэвшигч байгууллагад тавигдах нийтлэг шаардлагад нийцүүлэн байгууллага, бүтээгдэхүүн, үйлчилгээ төрөл тус бүрээр үндэсний чанарын шагнал олгох шаардлагыг тогтооно.

4.5. Стандартчилал, техникийн зохицуулалтын асуудал хариуцсан төрийн захиргааны байгууллага нь үндэсний чанарын шагналын шалгаруулалтад нэр дэвшигч байгууллагаас ирүүлсэн материалыг хүлээн авч, энэхүү журмын 5 дугаар зүйлд заасан шаардлагыг хангаж байгаа эсэхийг нягтлан, баримтжуулж ажлын хэсэгт хүлээлгэж өгнө.

4.6. Шалгаруулалтад ирүүлсэн баримт бичгийг архивын нэгж болгон хадгална.

4.7. Шалгаруулалтыг энэхүү журмын 5 дугаар зүйлд заасан нийтлэг шаардлагыг баримтлан явуулна.

Тав. Үндэсний чанарын шагналын шалгаруулалтад нэр дэвшигч
байгууллагад тавигдах нийтлэг шаардлага

5.1 Байгууллага нь 5-аас доошгүй жил үйл ажиллагаа явуулсан байх.

5.2 Бүтээгдэхүүн, үйлчилгээ, үйл ажиллагаа нь хэрэглэгчийн хэрэгцээ шаардлагад нийцсэн, чанар аюулгүй байдлыг хангасан нь итгэмжлэгдсэн тохирлын үнэлгээний байгууллагаар нотлогдож гэрчилгээжсэн байх.

5.3 Байгууллага нь үйл ажиллагаандаа чанарын, байгаль орчны, хүнсний аюулгүй байдлын болон бусад менежментийн тогтолцооны аль нэгийг

хэрэгжүүлсэн нь итгэмжлэгдсэн тохирлын үнэлгээний байгууллагаар нотлогдож гэрчилгээжсэн байх.

5.4 Экспортыг нэмэгдүүлэх чиглэлээр тодорхой үр дүнтэй арга хэмжээ авч ажилласан байх.

5.5 Импортыг орлох бүтээгдэхүүн үйлдвэрлэж зах зээлд нийлүүлж хэрэглэгчдэд танигдсан байх.

5.6 Ажлын байрыг нэмэгдүүлсэн /нотолгооны хамт ирүүлэх/ байх.

5.7 Нийгмийн ёс суртахуунд сөрөг нөлөө үзүүлэх бизнес эрхэлдэггүй байгууллага байх.

5.8 Холбогдох хууль, тогтоомж, техникийн зохицуулалт, стандартыг чанд мөрддөг байх.

5.9 Архи, тамхи, согтууруулах ундааны үйлдвэрлэл болон худалдаа эрхэлдэггүй байх.

5.10 Байгаль орчинд ээлтэй техник технологи, арга ажиллагаа, нэвтрүүлэн байгалийн нөөцийг хэмнэлттэй ашигласан байх.

5.11 Байгууллага нь шагнуулах тухай хүсэлт, дор дурдсан холбогдох баримт бичгийг бүрдүүлж зарласан хугацаанд Стандартчилал, техникийн зохицуулалтын асуудал хариуцсан төрийн захиргааны байгууллагад ирүүлнэ:

5.11.1 Аж ахуйн нэгжийн гэрчилгээний хуулбар;

5.11.2 Үйл ажиллагаа эрхлэх тусгай зөвшөөрлийн хуулбар;

5.11.3 Мэргэжлийн байгууллагаас олгосон /энэхүү журмын 5.2 ба 5.3-т хамаарах/ гэрчилгээний нотариатаар батлуулсан хуулбар;

5.11.4 Дараах мэдээллийг агуулсан байгууллагын тайлан, танилцуулга.

Үүнд:

1/ шагналын чиглэл;

2/ ажлын байр нэмэгдүүлсэн, боловсон хүчнийг хөгжүүлэх бодлогын сүүлийн 3 жилийн хэрэгжилт;

3/ хэрэглэгчийн сэтгэл ханамжийн судалгааны сүүлийн 3 жилийн мэдээлэл;

4/ сүүлийн 2 жилийн аудитаар баталгаажсан санхүүгийн тайлан;

5.12. Шаардлагатай тохиолдолд 5.11-д заасан баримт бичгийн хүрээнд нэмэлт материалыг шаардаж болно.

Зургаа. Үндэсний чанарын шагналыг илэрхийлэх таних тэмдгийг хэрэглэх

6.1. Шагнагдсан байгууллага нь үндэсний чанарын шагналыг илэрхийлэх таних тэмдгийг холбогдох хууль тогтоомжийн шаардлагын хүрээнд зар

сурталчилгаа, хэвлэмэл хуудас, бүтээгдэхүүний хаяг шошго, сав баглаа боодолд загвар хэмжээсийн дагуу томруулах буюу багасгаж хэрэглэж болно.

6.2. Энэхүү журмын 6.1-д заасан үндэсний чанарын шагналыг илэрхийлэх таних тэмдгийг 3 хүртэл жилээр хэрэглүүлнэ.


Долоо. Санхүүжилт

7.1 Үндэсний чанарын шагнал олгох үйл ажиллагааг зохион байгуулах зардлыг дараах эх үүсвэрээс санхүүжүүлнэ:




- Улсын төсөв;
- Төр, хувийн хэвшлийн түншлэл;
- Төсөл хөтөлбөр;
- Олон улсын байгууллага;
- Бусад

----- оОо -----

Үндэсний чанарын шагнал олгох
журмын хавсралт





Үндэсний чанарын шагналын цомны загвар, хэмжээ



Хавсралтын үргэлжлэл

Үндэсний чанарын шагналын цомны загвар, хэмжээ



250mm

50mm

Хавсралтын үргэлжлэл

Үндэсний чанарын шагналын цомны загвар, хэмжээ

